

## Pablo Timoteo Afianã Kirika Kenexô Fomani

### *Pablo Timoteo yoisharani*

<sup>1</sup> Ēkĩa Pablo ẽ mia kirika kenexô fomai. Epa Niospa fichipaiyai keskafakĩ Cristo Jesús ea katonni aõnoa әне meka shara ẽ yoifofãsafanõ. Ea yoini iskafakĩ: “Keyokõi yorafo yoife iskafakĩ: ‘Jesu-cristo matoõnoax nãxoni mato chaka mato soax-oxiki nã chanĩmara faafo tii afe nĩpaxanõfo,’ ixõ ato yoife nã ẽ mia yoiai keskafafe,” ixõ Jesús ea yoini.

<sup>2</sup> Timoteoshta, ẽ mĩo noikĩ ẽ mia kirika kenexô fomai mĩ tãpinõ. Epa Nios nõko Ifo Cristo Jesús feta mia noikĩ mia shara famanõfo. Askatari mĩ shinã mẽra mia shinãmasharakõinõfo mĩ õiti fekax-tenõma.

### *Ato Jesúsnoa yoisharafe*

<sup>3</sup> A ẽfe xinifãfe Epa Nios yonoxosharapaonifo keskari fakĩ, ẽri a yonoxosharai. Ẽ mẽraxõ ẽ afaa shinãchakayamafai ẽ yonoxosharai. Nãskakẽ ẽ mia Nios kĩfixõfafãini aicho fakĩ. Pena tii yafi fakish tii ẽ mia Nios kĩfixõfafãini. <sup>4</sup> Nãskakẽ mẽ oaino, mĩ ea shinãi oiaito ẽ mia õiferani. Nãskakẽ ẽ anã mia õisharapai, mia õi ẽ inimasharakõixiki. <sup>5</sup> Taefakĩkõi mĩ chichi Loida Jesús Ifofani. Askata mĩ efa Euniceri Jesús Ifofani. Afãfe Ifofasharakõimisfo keskafakĩ, mĩri Ifofasharai. Mẽ mia tãpia mĩ Ifofasharakõiaito nãskakẽ ẽ mia yoi.

<sup>6</sup> Anã shinãmakiyamafe ẽ mia mãmãxõ ẽ mia Nios kĩfixoni. Nãskakẽ Niospa mia katonni Jesús yoimis mĩ inõ. Mã chii nokakẽ nõ anã xofisa

fatiro anã xofisanõ. Nãskarifiakĩ mĩ anã yorafo ato yoipaima mã mĩ xokenãifinaxõ askara meekĩ mĩ Nios kĩfitiro anã mia õiti fepeaxosharanõ, mĩ anã ato yoisharanõ inimayanã a mĩ taefakĩ ato yoini keskafakĩ. <sup>7</sup> Nãskakẽ Niospa Yõshi Sharapa noko yorafoki mesematama. Aõxõ afama mĩshti noko amatiro. Askatari noko ato noimasharai. Aõxori noko shinãmasharatiro anã nõ chakafanõma. <sup>8</sup> Askafai rãfiyamafe Jesúsnoa yorafo yoitaifãfe rãfikima. Askatari eõri rãfiyamafe. Ë Jesucristo ato yoirifaito ea karaxa mẽra ikimatifoki. Mĩri Jesús ato tãpimasharafe; mĩ askaito, miari omiskõimanaifono rateyamafe. Jesúsnoax mĩ omiskõiaito, Niospa mia axoxii. <sup>9</sup> Akka Niospa ãfe Fake Cristo Jesús noko nĩchixoni nokoõnoax nãxoyonõ nõko chaka noko soaxoxiki. Askaxõ noko shinãni afe yora nõ inõ. Nõ yora chakafofiakẽ Niospa noko noimis. Taefakĩkõi Niospa mai onifaxoma, a inõpokoai tãpixõ, noko shinãni noko ifixixakĩ Jesúsxõ. <sup>10</sup> Jesús noko ano oamatai Niospa noko ifipaiyai anori nõ tãpipaonima. Akka rama iskaratĩa mã nõ tãpia noko ifimis Jesucristo noko nãxoni. Nãskax iskaratĩari nõ nai, nõ rateima omiskõipakenakafo mẽra nõ kairoko. Nõ Nios ari kaax anã nõ naxima. Jesús noko chaka soaxonano nõ Nios ari nĩpanaka. Mã iskaratĩa nõ tãpia Jesús noko nãxoni nõ chiifã mẽra kanõma noko ifiano.

<sup>11</sup> Niospa ea katoni na meka shara Cristoõnoa yora fetsafo ã ato tãpimanõ. <sup>12</sup> Nãskakẽ ã karaxa mẽranoax Cristoõnoax omiskõifi ã rãfima. Ë Jesús tãpikõiax chanĩmara fayanã. Jesús ãfe chaka taefakĩ ea soaxonitĩa ã Epa Nios iskafakĩ yoini: “Epa Niosi,

ea kexesharapakexafe Jesús afianã oaitã,” ixõ ã yoini keskara ea axoxii ã chanĩmara fakõini.

<sup>13</sup> Na ã Cristo Jesúsnoa mia chanĩmakõi tãpimana shinãmakiyamafe. Ë mia mẽstekõi tãpimana keskafakĩ, nãskari fakĩ ato tãpimafe. Cristo Jesús chanĩmara fakĩ afe rafekĩ aõxõ yorafo noife mĩ afe rafeakĩ. <sup>14</sup> Nã ã mia yoia keskara mĩ mẽraxõ shinãfe, shinãmakixikima. ãfe Yõshi Shara mĩ mẽra ikano mefeta aki. Õifãi, Niospa mia yoia keskafakĩ kachikiri fayamafe.

<sup>15</sup> Mã mĩ tãpia keyokõichi chanĩmara faafo Asia mai anoafãfe ea õifainafo. Askatari ato feta Figelo feta Hermógenesri ea õifainafo ato fe fokãkĩ. <sup>16-17</sup> Akka Onesíforokai askanima, eõ rãfinima ã karaxa mẽra ikikẽ. Nãafi Roma ano nokoxõ pena tii ea fenafafãikĩ ea karaxa mẽranoa fichita, ea õiyoi nã otitaiapaoni mẽxotaima ea õifaa õifakĩ, ea pishta inimamani. Nãskakẽ nõko Ifãfe Onesíforo ãfe ãfinõ ãfe fakefonõ Efeso anoxõ ato noikĩ ato kexesharaxonõ. <sup>18</sup> Onesíforo Efeso anoxori ea yonosharaxopaoni, mĩfi a õixõ tãpisharakĩ. Jesucristo anã fotoxõ noko ichanãfaxõ Onesíforoki inimakõikĩ noikĩ axosharaino ã askara fichipai.

## 2

*Nõ Jesús Ifofakĩ oa soraronõ ãfe xanĩfo nikakõiai keskafakĩ nõri Nios nikasharakõitiro*

<sup>1</sup> Timoteoshta, Jesucristo ãfe kerex sharaõnoax isharafe, afaa chakafaxima. <sup>2</sup> Ë yorafo Jesúsnoa yoiaito mĩri ea nikafafãini. Nãskarifiai mĩ ato chanĩmara fasharatiro. Nãskaxõ a feronãfakefãfe a shinã sharaifo ifife mĩ ato tãpimaxikĩ afãferi fetsafo tãpimanõfo.

3-4 Akka soraro õiti sharayato omiskõifikĩ tenetiro. Æfe pexe shināyamata ãfe xanĩfo fisti ifofaxõ nikasharakõi. A afara yonoai keskara ãfe xanĩfãfe yonomanaino soraro sharapa yonosharatiro. Nãskarifikĩ Niospa mia yonomapayai keskari fakĩ yonosharaxõfe fanĩrira fetsa shinākima. Jesúsnoax omiskõifi meseyamafe. <sup>5</sup> Askatari fetsafo xonõnõnãxikakĩ ìkisi itipinĩsharatirofo xonõnõnãpaikani. Askatari mĩri shinãsharafai Niospa mia yoiaito nikasharakõife. Akka mĩ nikasharayamaito Niospa mia, “Aicho, mĩ fãsi sharakõi,” ixokai mia yoitiro. <sup>6</sup> Askatari feronãfãke yonosharamiskõi ãfe tare efapafaxõ, ìkisi ãfe yono fitiro pixikĩ. Nãskarifikĩ mĩri Jesúsnoa yonoxosharamis Jesús mikiki inimakõinõ mia afara shara inãxii. <sup>7</sup> Ë mia yoiyai keskara shinãsharafe. Nõko Ifãfe mato tãpimasharai kiki.

<sup>8</sup> Nãskakẽ shinãmakiyamafe Jesucristo naafiakẽ anã Niospa ofofani noko ifimis inõ. Nã David ãfe fena. Nãnori nã meka shara ã yoiãfãimis. <sup>9</sup> Nã ã yoiãfãito, yorafãfe Jesús Ifofaafoma õitifishkikakĩ. Ë Niospa mekasharaõnoa yoiaino ekeki õitifishkikakĩ ea karaxa mẽra ikimanafo. Ë afaa chakafayamafiakẽ ã feronãfãke chaka keskarakẽ ea karaxa mẽra ikimanafo. Ea ikimafianifono Niospa meka Jesucristoõnoa ã enetiroma. <sup>10</sup> Nãskakẽ ã atoõnoax omiskõifikĩ ã tenekõi a Jesús Ifofaafõ tii ã ato tãpimani chanĩmara fanõfo, Nios fe ìpaxakakĩ.

<sup>11</sup> Na meka sharakõi nikafe:

Nõ Jesúsnoax nakĩ nõ chanĩmara faax nõ afe ìpanaka. <sup>12</sup> Askatari nõ Jesúsnoax omiskõifikĩ nõ tenei, nõ Jesús fe Epa Nios ariax xanĩfo

ĭpanakakĩ. Akka nõ Jesús potakĩ, “Niospa fake-mara,” ixõ nõ askafaito Jesús noko yoitiro iskafakĩ: “Mã ea Niospa Fakemara faito ěri mato kopitiro iskafakĩ: Mĩ ěfe fakema,” fakĩ noko fatiro. <sup>13</sup> Askatari nõ Jesús nikayamai nõ isharayamafimisno, akka akai askarama, aroko isharakõimis. Aatokai afaa chanĩ yoimisma, ěfe meka chanĩmakõi. Aakai õiti ranăyama.

*Afe keskara a Niospa meka yoimis shara itiomẽ*  
*Nios akiki inimanõ*

<sup>14</sup> Na ě mia yoiai anori, mefe yorafo ichanãmisfo ato shinãma fafãife. Niospa mia xafakĩa õiaino ato yoife Niospa mekaõnoa feratenãnoġfoma, feratenãkani aõnoax mekanõfoma. Akka fatotokai yoisharaimãkai fatotori yoisharaimamãkai ikaxõ tsõa tãpitiroma tãpipai kakĩ. Anorima nika kakĩ tsõa tãpitiroma. Askakani fanĩrira mekamisfo ãa chanĩkani. <sup>15</sup> Timoteo, Niospa meka pena tii õife. Askafaxõ Niospa meka tãpisharaxõ yorafo mẽstekõi ato tãpimafafãife. Mĩ askaito Niospa mĩõnoa yoitiro iskafakĩ: “Na ea yonoxosharamis, ě akiki inimasharakõi,” ixõ mĩõnoa yoixiki. Mia askafainokai mĩ aõ rãfitiroma. <sup>16</sup> A feratenãmisfo ãto meka nikayamafe. Nõ ãto meka nikaxõ meka mẽstekõi Jesúsnoa nõ nikapaitiroma. Askaxõ anã nõ Nios Ifofapaitiroma. Chakakõi itiro. <sup>17</sup> Oa yora faraxiki finaxõ, koofi payokometiro keskafakĩ, a yõra anorima yoikĩ yorafo ãto õiti chakana fatiro. Himeneo feta Fileto askaraġ chakakõi ato yoimisfo. <sup>18</sup> A Jesús oaitĩa a namisfo anã otox-iaifo mã nõ tãpifekẽ, a feronãfake rafeta Hime-neo feta Fileto anorima mato yoimisfo. Akka nõ tãpia mã Jesús anã fotoaino Epa Niospa nã

namisfo otofaxii. Akka nã rafeta mato pãramisfo ãa chanĩkakĩ. Iskara mato yoimisfo: “Mã finõa a mato yoimisfo keskara. A Niospa namisfo mã ato otofaa,” ixõ a refeta yoimis. Afãfe nã meka nikaxõ shinãkĩ iskafatirofo: “Ooa. Mã nõ nakẽ Niospa noko anã otofaima,” ixõ anorima shinãtirofo. Anori shinãkani Jesús shinãmakitirofo. <sup>19</sup> Akka Niospa meka chanĩmakõi. Tokirinĩfakai tsõa rafetiroma. Niospa meka nãskarari. Tsõakai ãfe meka fetsafatiroma. A chanĩma, nã yoimis keskara nãskarakõi. Tokirinĩfakĩ yõra keneakai tsõa soatiroma. Nãskarifiakĩ Niospa meka kenenifo iskafakĩ: “Nõko Ifãfe afe yorafo tãpikõia.” Nãskakaxõ, “Afe yorafãfe a afara chakafamisfo keskara potatirofo,” ixõ kenenifo.

<sup>20</sup> Feronãfãke ãfe pexe efapa sharakõi faxõ a mẽra kecho sharakõifo faa, askaxõ a kecho sharafo mẽra afara sharafo fatiro. Akka a kecho chakafo mẽra afara chakafori fatiro. <sup>21</sup> Mã mĩ chaka mĩ xatekõiax, nã fẽta xinikĩ afara chaka potatiro keskara itamaroko. Nã sapa choka keskara sharakõi mĩ itiro. Nãskax Jesús keskara shara mĩ ikaino Epa Niospa mia yonomapaiyai keskara mĩ aõxõ afara sharafo faxotiro.

<sup>22</sup> A naetapafãfe afara chakafo shinãkĩ nã apaiyai keskara faifono mĩri askayamafe. Anori shinãtamaroko Niospa fichipaiyai keskara shinãfe, Jesús chanĩmara fafãi, yorafo noikĩ, fetsafãferi shinãsharakõiaifono, Jesús Ifofaifo ato fe mẽstekõi isharakõife. <sup>23</sup> Anã ã mia yoinõ, ea nikasharafe. A feratenãifo ato nikayamafe. Ato fe feratenãpaiyamafe. Askara yorafo samama õitifishkitirofoki. <sup>24</sup> Niospa meka yoimisto tsoa

feratetiroma. Anori askatamaroko keyokōi yorafo ato noisharafāi, ato tãpimasharatiro, tenekōisharata ato yoitiro. <sup>25</sup> Fětsa Niospa mekakōi nikakaspakī meka anorima fisti shināito, fenāmāshta ato tãpimasharafe. Mī ato askafaino āto chaka xatetiromo Niospa mefeta akaino. Askaxō Jesús chanīmara fakōinōfo. <sup>26</sup> Nāskafakī anā Niosnoa shināsharanōfo. Oa tarapa mēra ikia keskara Satanás ato fapai kiki. Nāskaxō ato amapaiyai keskafakī ato yonofafāini. Akka mia nikaxō Jesús ato ifitiro. Nāskaifono Satanás afianā ato afara yonomatiroma. Afianā tarapa mēra ikia keskara ikanima.

### 3

#### *Afeskakanimākai yorafo na mai keyoaino*

<sup>1</sup> Timoteo, ōisharafe. Ē mia yoi Jesús chaima oaino fekaxkōi ixii kiki. <sup>2</sup> Fetsa noitama āakōi kexemei, askatari fětsa āfe kori fisti shināfāi, āakōi anofi inimamis ikāi, Niosnoa chaka yoimis ikāi, askaxō āto apa yafi āto afa nikakaspamisfo ikāi, yonoxofiaifāfe aichora ato famisfoma ikāi, ato noikaspamisfo, Niosnoa shinātama chakakōi fistis shināmisfo, <sup>3</sup> afe yorakōi noiyamafāi, fetsafo noiyamata axokaspafāi, fetsafo āa pāramis ikāi, āa apaiyai keskafakī enemisma ikāi, mitsisipakōi ikāi, afara mīshti sharafo noiyamafāi, <sup>4</sup> askata a afe rafeafo ato chakafafāi, samama ōitifishkimis ikāi, “Ēkai tsoa keskarama,” ixō yoifāi, Nios noitama afara chaka fisti fakī ato inimamapaimiskōi ipaikani. <sup>5</sup> Askata a Nios Ifofafo ichanāifono ato fe ichanākaxō Niospa meka nikafikaxō shināsharakanima. “Nōri Nios

Ifofai,” ixõ ãa mato pãrakani. Askax ãa chanĩmisfo Nios Ifofayamafiakanax.

Askaifãfe õi ato fe rafeyamafe. <sup>6</sup> Askara yorafãfe a fofãsakakĩ ato pãratirofo a kero tãpisharamisfoma fanĩrira ato yoimisfo ato anorima yoiaifãfe. Atirifãfe noko yoikõikanira ato famisfo. Nãskakẽ a xotofakefãfe noko yoikõikanira ikaxõ a yoiaifo anori ato nikataifafo. Nãskakẽ a kerofãfe ãa shinãkani iskakakĩ: “Nõ fãsi chakakakainaito, noko tãpimasharanõfora,” ixõ shinãkani anorima ãto shinã mëraxõ shinãkaxõ nãskai fekaxtetitaiäfo. <sup>7</sup> Nãskaxõ a ato yoimis fẽtsari ato yoiaito, nikatai fakaxõ Niospa meka sharakõi tsõa mẽstekõi tãpinakafoma. A rama ikai fẽtsari yoiaito, nikakãkiri aõxõ tãpisharapaifikakĩ, tsõa tãpinakama Niospa mekakõi. <sup>8-9</sup> ¿Mã mĩ shinãimẽ anori aakõi Egipto anoa xanĩfãfe Faraón israelifo ato yonomapaoni, mesemaxõ? Askaito õikĩ Niospa Moisés nĩchini afe yorafo israelifo mai fetsa ari ato iyotanõ. Ato askafaito Faraón ato nĩchikaspani. Askaino a feronãfake rafe ano mokaya inifo; fẽtsa ane Janes ikaino fẽtsa aneri Jambres ini, nã rafe Faraón fe rafeäfo ini. A rafe Moiséski õitifishkinifo. Nãskaxõ ãto xanĩfo Faraón ãa pãranifo ato Moisés nikanõma. Askafaiãfe õikĩ chipo ãto xanĩfãfe tãpini Moisés a feronãfake mokaya rafe finõkõia ini. Mokayafiakaxõ afaa tãpiama inifo. Nã rafeta Faraón yoinifo Moisés nikanõma. Nãskafakĩri fetsafãfe Niospa meka mẽstekõi ato nikamakaspakani. Nãskakaxõ Niospa meka mẽstekõi tsõa yoima ãto shinãmã anorima shinãkani. Oa Janes feta Jambres ãto xanĩfo anorima yoiaifono ãto xanĩfãfe ato tãpini



keskafakī. Nāskafakīri na iskaratīa na anorima yoimisfo āa chanīaifāfe nō ato tāpīxii afāfe afaa tāpiafoma.

*Mā Pablo mekai xatekī Timoteo yoisharani*

<sup>10</sup> Timoteo, mā mī ea ōisharakōimiskī ē ato afo tāpimanaito. Mā mī ea ōimiskī afeskax ē isharaimākai, Nios fisti inimamapaifāi, Jesús noikī chanīmara fafāi, afarafo chakafo nokoaito ē tenefāi, ē yorafo noifāi, <sup>11</sup> a yora chakafāfe ea Jesúsxō chakafaifāfe ē tenefāi, askai ē omiskōimis. Mā mī tāpia ē afo tenemis. Askatari mā mī tāpia a Antioquía anoa ita, Iconio anoa ita, a Listra anoxō ea chakafafiaifāfe ē teneni. Nāskakē nā chakafoōxō nōko Ifo Nios ea kexesharamis ē tenesharakōimis inō. <sup>12</sup> Na ē mia yoiai anori chanīma. Nō Cristo Jesús fe rafesharapaiyaito a Jesús noikaspamisfāfe noko omiskōimaxii. <sup>13</sup> A yora chakafāfe āa ato pāarakani. Askatari chipo ato pāarakī finakōixikani. Nāskakē afara chakafakī ato pāraifāfe ōikī Satanásri ato pāraxii.

<sup>14</sup> Nāskakē Timoteo, na meka Jesúsnoa mī tāpisharai. A mia tāpimanafo mā mī tāpikōia. Nāskakē mī tāpisharakōi. Anori meka chanīmara fafe, shināmakikima. <sup>15</sup> ¿Mā mī shināimē yomepishtaxō mī Niospa meka tāpiakī? A mekaōnoa mī shināsharamiskī Cristo Jesús chanīmara faax nō afe isharapakenaka. <sup>16</sup> Niospa ato shināmanaino feronāfakefāfe kirika ato kenexonifo Niospa meka ato tāpimaxikakī. Fetsafāfe afara chakafaifono, nō ato Niospa meka tāpimasharatiro anā askayamanōfo. Askatari nō isharapaikōikī nō Niospa meka ōikī nō tāpitiro afeska faxō nō Jesús Ifofasharatiromākī. <sup>17</sup> Akka

Nios Ifofamisfāfe āfe meka nikasharakōikaxō, Nios yonoxosharakōitirofo.

## 4

<sup>1</sup> Timoteo, ē mia kaxeta yoima, nikafe. Jesús oatīa nōko xanīfokōi ixii Apa Nios feta, keyokōi yorafo namisfo yafi niafori ato yoixii. Jesús chanīmara fakanax afe nai mēra nisharapakenakafo; akka a chanīmara famisfoma chiifā mēra Niospa ato potai omiskōipakexanōfo. Nāskakē āfe Fake Jesucristo feta Niospa noko ōiaino ē mia yoi iskafakī: <sup>2</sup> Niospa meka fena fenakima ato yoife fenāmāshta shara. A nikapaiyaifo askatari a nikakaspaifori ato yoisharafe, mī ato yoisharaino āto chaka xatenōfo Jesús Ifofasharax isharanōfo. Shināsharata, Niospa meka mēstekōi yoife. <sup>3</sup> A yora chakafamai nokoaino yorafāfe Niospa mekakōi nikakaspatirofo. A nikatamaroko meka fetsafo shinātirofo, nā apaiyai keskafakakī. Anori fisti shinākani. Nāskakanax ano fisti ichanākaxō anorima a fetsafāferi yoiaito nikakakī. <sup>4</sup> A Niospa mekakōi nikakaspakani a āto xinifāfe shināpaonifo keskari fakakī. <sup>5</sup> Nāskakē Timoteo, ōisharafe. Afara afeskaraito Niospa mekakōi Ifofasharafe; mī shināfenotama anori tāpisharafe. Mia omiskōimanaifono teneffe. Kafākakaikī yorafo Jesúsnoa tāpimafe Ifofanōfo. Nā mia Niospa yoiai keskafafe shināfāi.

<sup>6</sup> Iskaratīa eōnoa ē mia yoi. Anā ē samarakaima mē chaima nai ea Jesúsxō retexikani. <sup>7</sup> Mē yonosharakōitiani ēfe Ifo Jesúsxō. Ē chanīmara fatitaifaa enekima. Keyokōi Niospa ea yoiai

keskara mẽ aka. <sup>8</sup> Nõko Ifokõichi ea õimis ã Ifo-fasharakõiaito. Nãskakẽ ã akiki nokoaito ea afarafo inãsharaxii. Eres fisti ã fixiima. Nã nõko Xanĩfo finakõia oaitĩa keyokõi nã Ifofaafãferi fixikani. Aõ noikĩ a manaifori ato inãsharaxii.

*Pablonõ Timoteo fisti yoini kirika kenexokĩ*

<sup>9</sup> Timoteo, ea ano orisape. <sup>10</sup> Demãs afarafo fichipaikĩ ea nonoa õifaiti, Tesalónica ano kakĩ. Askatari Crescenteri kati Galacia ano. Askatari Titori Dalmacia ano kati. <sup>11</sup> Akka na Lucas fisti efe ika. Nãskakẽ Marcos ea efexõfe ea axosharaiyonõ Niospa meka ato yoikĩ. <sup>12</sup> Akka ã Tíquico Efeso ano nĩchiyamea ãa. <sup>13</sup> Mĩ oaitĩa ea ãfe rakoti fexõfe a Troas ano ã faferati a Carpo pexe ano. Askata ãfe kirikari ea fẽxota, askatari kirika fetsari ea fẽxota a fakka fichisharakõi ã akiki kenemis, aari ea fexõfe. ã afo fichipaikai.

<sup>14</sup> Na yami famis Alejandro ea fãsi meka famis. Aato ea chakafaito õikĩ Niospa kopikiri omiskõimaxii. <sup>15</sup> Õisharafe. Alejandro miari chakafatiroki na meka shara Jesúsnoa nõ yoiaito noko meka xatemapai kiki.

<sup>16</sup> Akka ea taefakĩ xanĩfo ano iyonifo tsõakai eõnoa yoisharanima. Akka keyokõichi ea õifainifo fõkakĩ. Askafiaifono ã Nios iskafakĩ yoini: “Epa, na ea nonoa õifainaifo ato chakafayamafe,” ixõ ã Nios yoiyamea. <sup>17</sup> Ea askafafiaifono ãfe Ifãfe Jesús ea potayameama, ea kexexõ. Ea askafiaifono ã ratetima ãfe Ifãfe ea kexeano ãfe kerex ea inãno ã ato yoinõ. A judeofomafãfe ea yõkaifãfe keyokõi nikanõfo ã Niospa meka Jesúsnoa ato yoiyamea. ã askaito ea retepaikakĩ, oa poomãnã noko pipaiyai

keskara ea fatifo ea retepaikakĩ. Ea askafafiai-fono ea Niospa kexesharayamea ea tsõa retenõma. <sup>18</sup> Afara chakafo ekeki nokoaito õikĩ ẽfe Ifãfe ea kexetaifa a ẽ akiki nai mẽra nokoaitĩa. Fãsi nõko Nios sharakõi, tsoa fẽtsakai askafatiroma. Nãskakẽ tsõa nõko Nios finõtiroma. Ares fisti sharafinakõia. Nõ aõnoa yoisharapakexanõ. Nãskapakexapainõ.

*Pablo mã mekai xatekĩ ato meka shara fomani*

<sup>19</sup> Timoteoshta, ea Prisca yafi Aquila ea yoixõfe, keyokõi yorafo Onesíforo pexe ano ikafori ea yoixõfe. <sup>20</sup> Erasto Corinto ano nẽteyamea. Trófimo isinĩ ikĩ rakakẽ ẽ Mileto ano rataferayamea. <sup>21</sup> Nã mechaka ikamano ekeki ofe. Eubulonõ, Pudentenõ, Linõnõ, Claudianõ, keyokõichi Jesús chanĩmara faafãfe mato yoisharapaikani.

<sup>22</sup> Nõko Ifo Jesucristo mefe ipaxanõ. Askatari Niospa mato noikõikĩ mato kexesharakõinõ keyokõi. Nã tii ẽ mato yoi.

*Ëkĩa Pablo*

**Niospa meka fena Jesucristo<sup>noa</sup>**  
**New Testament in Yaminahua (PE:yaa:Yaminahua)**

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

**Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

---

PDF generated using Haiola and XeLaTeX on 13 Jul 2024 from source files  
dated 29 Jan 2022

6c7b7ce2-9d87-5405-91e6-71ce1387adcc